



გ ა ნ რ ი ნ ე ბ ა

(საქართველოს სახელით)

19 აპრილი, 2011 წელი

ქ. თბილისი

**თბილისის სააპელაციო სასამართლოს
ადმინისტრაციულ საქმეთა პალატა**

მოსამართლე – მანანა ჩოხელი

აპელანტი – ბაბო ხვედელიძე

მოწინააღმდეგე მხარე – საქართველოს იუსტიციის სამინისტროს აღსრულების ეროვნული ბიუროს თბილისის სააღსრულებო ბიურო

მესამე პირი – ნუგზარ გაბრიჭიძე

დავის საგანი – ქმედების განხორციელების დავალდებულება

გასაჩივრებული გადაწყვეტილება – თბილისის საქალაქო სასამართლოს ადმინისტრაციულ საქმეთა კოლეგიის 2011 წლის 25 თებერვლის გადაწყვეტილება

აპელანტის მოთხოვნა – გასაჩივრებული გადაწყვეტილების გაუქმება და ახალი გადაწყვეტილების მიღებით სარჩელის დაკმაყოფილება

ზეპირი მოსმენის გარეშე განიხილა სასამართლო შეტყობინების საჯაროდ გავრცელების საკითხი და

გ ა მ ო ა რ კ ე ი ა :

თბილისის საქალაქო სასამართლოს ადმინისტრაციულ საქმეთა კოლეგიის 2011 წლის 25 თებერვლის გადაწყვეტილებით ბაბო ხვედელიძის სარჩელი არ დაკმაყოფილდა. გადაწყვეტილება სააპელაციო წესით გაასაჩივრა მოსარჩელემ და მოითხოვა გადაწყვეტილების გაუქმება და ახალი გადაწყვეტილების მიღებით სარჩელის დაკმაყოფილება.

თბილისის სააპელაციო სასამართლოს ადმინისტრაციულ საქმეთა პალატის 2011 წლის 13 აპრილის განჩინებით დაინიშნა საქმის ზეპირი განხილვა – 2011 წლის 04 მაისს 12:00 საათზე, სხდომის დარბაზი №14.

საქმის მასალების გაცნობის შედეგად, სააპელაციო პალატა მიიჩნევს, რომ საქმეში მონაწილე მესამე პირისთვის – ნუგზარ გაბრიჭიძისთვის სასამართლო სხდომის დღე ცნობილი უნდა გახდეს სასამართლო შეტყობინების საჯაროდ გავრცელების საშუალებით, შემდეგ გარემოებათა გამო:

დადგენილია, რომ თბილისის სააპელაციო სასამართლოს მიერ ნუგზარ გაბრიჭიძისთვის გაგზავნილი სასამართლო უწყება და სააპელაციო საჩივარი მისამართებზე: თბილისი, ჩუბინაშვილის ქ. №66 და თბილისი, ზანდუკელის ქ. №15, არ ჩაბარდა ადრესატს მოუძიებლობის გამო.

საქართველოს ადმინისტრაციული საპროცესო კოდექსის პირველი მუხლის მე-2 ნაწილის თანახმად, თუ ამ კოდექსით სხვა რამ არ არის დადგენილი ადმინისტრაციულ სამართალწარმოებაში გამოიყენება სამოქალაქო საპროცესო კოდექსის დებულებანი.

საქართველოს სამოქალაქო საპროცესო კოდექსის 78.1-ე მუხლის თანახმად, თუ მხარის ადგილსამყოფელი უცნობია ან მისთვის სასამართლო უწყების ჩაბარება სხვაგვარად ვერ ხერხდება, სასამართლო უფლებამოსილია გამოიტანოს განჩინება სასამართლო შეტყობინების საჯაროდ გავრცელების შესახებ. სასამართლო შეტყობინება საჯაროდ ვრცელდება შესაბამისი სასამართლოს შენობაში თვალსაჩინო ადგილზე ან ვებგვერდზე განთავსებით, ან დაინტერესებული მხარის მოთხოვნის შემთხვევაში, მისივე ხარჯებით იმ გაზეთში, რომელიც მასობრივადაა გავრცელებული მხარის საცხოვრებელი ადგილის შესაბამის ადმინისტრაციულ-ტერიტორიულ ერთეულში, ან ინფორმაციის სხვა საშუალებებში გამოქვეყნებით. ამ მუხლის I ნაწილით გათვალისწინებულ შემთხვევაში, სასამართლო უწყება მხარისათვის ჩაბარებულად ითვლება სასამართლო შეტყობინების შესაბამისი სასამართლოს ვებგვერდზე განთავსებიდან მე-7 დღეს.

თბილისის სააპელაციო სასამართლომ იმსჯელა საქმის სრულყოფილად, კანონმდებლობით დადგენილ უმოკლეს ვადაში განხილვისა და გაჭიანურების თავიდან აცილების გარემოებებზე, გაითვალისწინა საქართველოს სამოქალაქო საპროცესო კოდექსის 78-ე მუხლით განსაზღვრული დანაწესი, რის შედეგადაც მიიჩნევს, რომ მართლზომიერია საქმეში მონაწილე მესამე პირს – ნუგზარ გაბრიჭიძეს სასამართლო სხდომის დღის შესახებ ეცნობოს სასამართლოს ვებგვერდზე განთავსებით.

ზემოაღნიშნულის თანახმად, თბილისის სააპელაციო სასამართლოს ადმინისტრაციულ საქმეთა პალატას საქართველოს სამოქალაქო საპროცესო კოდექსის მე-200.1 მუხლის საფუძველზე, საქმის მომზადების მიზნიდან გამომდინარე, რითაც უნდა მოხდეს ერთ სასამართლო სხდომაზე საქმის დამთავრება და საქმის განხილვის უსაფუძვლო გაჭიანურების თავიდან აცილება, მართლზომიერად მიიჩნევს, მესამე პირის გაფრთხილებას სასამართლო სხდომის დღის შესახებ საჯარო შეტყობინების საშუალებით.

სააპელაციო პალატამ იხელმძღვანელა საქართველოს ადმინისტრაციული საპროცესო კოდექსის პირველი, საქართველოს სამოქალაქო საპროცესო კოდექსის 372-ე, 78-ე, მე-200 და 284-285-ე მუხლებით და

და ა ა დ გ ი ნ ა:

1. ნუგზარ გაბრიჭიძეს სასამართლო შეტყობინების საჯაროდ გავრცელების საშუალებით ეცნობოს, რომ ბაბო ხვედელიძის სააპელაციო საჩივრის ზეპირი განხილვა თბილისის სააპელაციო სასამართლოში დაინიშნულია 2011 წლის 04 მაისს, 12:00 საათზე, სხდომის დარბაზი №14, მისამართი – თბილისი, გრ. რობაქიძის გამზ. №7ა;
2. ნუგზარ გაბრიჭიძეს ეცნობოს, რომ იგი დაბარებულია სასამართლოს მთავარ სხდომაზე საქმეში მესამე პირის სახით მონაწილეობის მისაღებად;
3. სასამართლო შეტყობინება განთავსდეს თბილისის სააპელაციო სასამართლოს ვებგვერდზე (www.tbappeal.court.gov.ge);
4. ნუგზარ გაბრიჭიძეს ეცნობოს, რომ მისთვის სასამართლო უწყება ჩაბარებულად ჩაითვლება საჯარო შეტყობინების სასამართლოს ვებგვერდზე განთავსებიდან მე-7 დღეს;
5. განჩინება არ გასაჩივრდება.

მოსამართლე

მანანა ჩოხელი